

Buxhesh
shërbimet
Legjislacioni
8.6.2014
GP



MINISTRIA E FINANÇAVE
Nr. 8301 / Prot.
Data 6.6.2014

REPUBLIKA E SHQIPËRISË
KËSHILLI I MINISTRAVE

Finanç
Qendër
10.06.2014

U D H Ë Z I M

Nr. 1, datë 4.6.2014

PËR

MËNYRËN E EKZEKUTIMIT TË DETYRIMEVE MONETARE
TË NJËSIVE TË QEVERISJES SË PËRGJITHSHME
NË LLOGARI TË THESARIT

Në mbështetje të nenit 100 të Kushtetutës, të pikës 4, të nenit 589, të ligjit nr.8116, datë 29.3.1996, “Kodi i Procedurës Civile të Republikës së Shqipërisë”, të ndryshuar, dhe të neneve 43 e 54, të ligjit nr.9936, datë 26.6.2008, “Për menaxhimin e sistemit buxhetor në Republikën e Shqipërisë”, të ndryshuar, me propozimin e ministrit të Financave dhe të ministrit të Drejtësisë, Këshilli i Ministrave

V E N D O S I:

1. Ky udhëzim ka si qëllim përcaktimin e mënyrës së ekzekutimit nga llogaria e thesarit të detyrimeve monetare të njësive të qeverisjes së përgjithshme, që rrjedhin nga vendimet gjyqësore të formës së prerë.
2. Njësitë e qeverisjes së përgjithshme janë përgjegjëse për zbatimin e vendimeve gjyqësore dhe për shlyerjen e detyrimeve që rrjedhin prej tyre.
3. Ekzekutimi i vendimeve gjyqësore realizohet nga njësia shpenzuese përgjegjëse:
 - a) me fondet buxhetore për ekzekutimin e vendimeve gjyqësore, të akorduara në ligjin vjetor të buxhetit pasardhës për njësinë shpenzuese, për shlyerjen e detyrimeve të vitit paraardhës, duke respektuar radhën e paraqitjes në njësinë shpenzuese;

- b) nga të ardhura të tjera, të siguruara nga njësia e qeverisjes së përgjithshme, në bazë të legjislacionit përkatës, dhe të cilat shërbejnë si burime financimi për vetë njësinë.
4. Njësitë e qeverisjes së përgjithshme, gjatë vitit buxhetor, mbajnë *database* për vendimet gjyqësore të formës së prerë që parashikojnë detyrime monetare, si dhe për shumat e detyrimeve. Shuma totale e detyrimeve për ekzekutimin e vendimeve gjyqësore të formës së prerë bëhet pjesë e procesit të programimit buxhetor të vitit të ardhshëm, sipas përcaktimeve të akteve ligjore e nënligjore përkatëse. Këto parashikime i bëhen të njohura edhe njësisë së qeverisjes së përgjithshme nga e cila varen.
 5. Ekzekutimi i vendimeve gjyqësore që janë parashikuar të shlyhen nga buxheti përkatës, bëhet sipas radhës së paraqitjes zyrtare të tyre në vitin paraardhës dhe grafiku i shlyerjes bëhet publik, nëpërmjet publikimit në faqen *on-line* të njësisë shpenzuese apo në forma të tjera të publikimit, që i bëhen të ditura publikut. Përmbaruesi i përmbahet grafikut të shlyerjes së detyrimit të publikuar.
 6. Në rastet kur njësia shpenzuese debitore ndodhet përpara detyrimeve që kanë të bëjnë me shuma të mëdha apo jotipike, atëherë, në bazë të nenit 517, të Kodit të Procedurës Civile, i drejtohet gjykatës, për shlyerjen pjesore të detyrimit me fondet e vitit/viteve në vijim, duke bërë edhe njoftimin përkatës pranë përmbaruesit gjyqësor. Në rast pranimi, nga ana e gjykatës, të kërkesës për ekzekutimin e pjesshëm të vendimit, njësia shpenzuese gjatë planifikimit të buxhetit për vitin pasardhës parashikon si nevojë vetëm shumën e këstit/kësteve, që parashikohen të shlyhen gjatë atij viti buxhetor, në përputhje me vendimin e gjykatës.
 7. Nëse gjatë vitit buxhetor ka fonde të papërdorura, përpara mbylljes së vitit buxhetor këto fonde mund të përdoren, për aq sa është e mundur, për shlyerjen e një pjese të vendimeve gjyqësore të formës së prerë, duke respektuar radhën e paraqitjes.
 8. Vendimet gjyqësore të njësisë së qeverisjes vendore, të paraqitura zyrtarisht te këto njësi, ndjekin të njëjtën procedurë të përshkruar në këtë udhëzim.
 9. Në rastin kur njësia shpenzuese nuk ka ndjekur vullnetarisht asnjë nga procedurat e parashikuara në pikat 5 ose 6 të këtij udhëzimi, atëherë përmbaruesi gjyqësor fillon procedurat e ekzekutimit të detyruar nga llogaria e thesarit. Llogari e thesarit, sipas parashikimeve të nenit 8, të

ligjit nr.9936, datë 26.6.2008, "Për menaxhimin e sistemit buxhetor në Republikën e Shqipërisë", të ndryshuar, konsiderohet llogaria e unifikuar e thesarit në Bankën e Shqipërisë.

10. Në rastin e parashikuar në pikën 9, të këtij udhëzimi, kur përmbaruesi gjyqësor kërkon vendosjen e masës së sekuestros, ndiqet procedura e mëposhtme:
 - a) Përmbaruesi gjyqësor i dërgon titullarit të njësisë shpenzuese dhe degës së thesarit:
 - dokumentin që vërteton njoftimin e njësisë shpenzuese debitore për ekzekutimin vullnetar dhe të detyruar të detyrimit dhe marrjen dijeni nga ana e tij. Dokumentacioni është, sipas rastit, origjinal ose i noterizuar apo i vërtetuar "njësia me origjinalin", nga sekretaria e gjykatës;
 - vendimin gjyqësor, i cili, në kuptim të nenit 510, të Kodit të Procedurës Civile, konsiderohet si titull ekzekutiv;
 - kërkesën/urdrin e zyrës së përmbarimit për vendosjen e masës së sekuestros.
 - b) Titullari i njësisë shpenzuese, brenda 5 (pesë) ditëve, i kërkon degës së thesarit pagesën e shumës së detyrimit nga llogaria e parashikuar në këtë udhëzim;
 - c) Dega e thesarit, brenda 10 (dhjetë) ditëve nga marrja e kërkesës nga titullari i njësisë shpenzuese, bën pagesën e detyrimit.
11. Nëse titullari i njësisë shpenzuese nuk paraqet kërkesën brenda afatit të parashikuar në shkronjën "b", të pikës 10, dega e thesarit vendos masën e sekuestros në shpenzimet operative (artikulli buxhetor 602) të njësisë shpenzuese, në masën e vendimit gjyqësor të formës së prerë, por pa prekur shpenzimet e detyrueshme për funksionimin e institucionit, si: energji, ujë dhe materiale e shërbime speciale (artikulli 6021), të përshkruara në manualin e Shpenzimeve Publike, të publikuara nga ministri i Financave.
12. Në asnjë rast nuk mund të vendoset masa e sekuestros mbi të ardhurat në burim të buxhetit të shtetit, pasi ato nuk janë fonde buxhetore të njësisë debitore.
13. Vendimet gjyqësore të njësive të qeverisjes qendrore, të paraqitura zyrtarisht deri më datë 31.12.2013, në Ministrinë e Financave, të shlyhen

sipas procedurës së përcaktuar në vendimin nr.50, datë 5.2.2014, të Këshillit të Ministrave, “Për miratimin e strategjisë për parandalimin dhe shlyerjen e detyrimeve të prapambetura e të planit të veprimit”, dhe udhëzimit përkatës, nga fondet e miratuara në ligjin vjetor të buxhetit të shtetit, për shlyerjen e detyrimeve të prapambetura.

14. Vendimet gjyqësore të njësive të qeverisjes qendrore, të paraqitura zyrtarisht te këto njësi, pas datës 31.12.2013 dhe deri në ditën e hyrjes në fuqi të këtij udhëzimi, ndjekin këtë procedurë:

- a) në rastin kur ka të parashikuar fonde për këtë qëllim, ekzekutohen menjëherë duke respektuar radhën e paraqitjes së vendimeve gjyqësore;
- b) pjesa tjetër rregullohet si parashikim për vitin 2015, në përputhje me këtë udhëzim.

15. Udhëzimi nr.2, datë 18.8.2011, i Këshillit të Ministrave, “Për mënyrën e ekzekutimit të detyrimeve monetare të institucioneve buxhetore në llogari të thesarit”, shfuqizohet.

16. Ngarkohen njësitë e qeverisjes së përgjithshme, degët e thesarit dhe përmbaruesit gjyqësorë për zbatimin e këtij udhëzimi.

Ky udhëzim hyn në fuqi pas botimit në “Fletoren zyrtare”.

KRYEMINISTRI

EDI RAMA

MINISTRI I FINANCAVE

SHKËLQIM CANI

MINISTRI I DREJTËSISË

NASIP NAÇO



NR.PROT.2239/1
DATË 5.6.2014

MINISTRISË SË FINANCAVE
MINISTRISË SË DREJTËSISË
DHOMËS KOMBËTARE TË PËRMBARIMIT
DREJTORISË SË THESARIT
QENDRËS SË BOTIMEVE ZYRTARE

Sekretari i Përgjithshëm

Engjëll AGACI

